

Debate politico organisa door di hubentud, pa e hubentud Dies lider politico confirma pa debate Millenials

ORANJESTAD - Algun hoben a bini hunto y organisa un debate politico cu e meta pa yuda informa pueblo di Aruba, specialmente "Millennial Voters".

Queenanne Bergen, un di e hoben organisadonan di 'Encuentro Politico Constructivo' ta conta Bon Dia Aruba di un debate politico cu nan lo organisa riba diahuebs 13 di juli na Cas di Cultura cuminsando 7'or di anochi.

Un grupo di mas o menos 20 hoben a bin especificamente hunto pa organisa e debate aki. Cada un cu nan mesun backround, opinion y punto di bista pero cu e mesun meta y tarea; pa organisa un debate riba un cierto nivel.

Debate di Millenials pa Millenials

Tur dies lider di partidonan cu ta bay participa den siguiente eleccion ta confirma pa e debate aki.

"Nos ta yam'e Millennial Edition door cu e ta special pa e 'millennialsnan' (hobenman adulto entre 18 -35 año) cu ta bay vota pa prome biaha ." sra. Bergen ta splica. E hoben ta splica cu door di haci esaki

nan ta yuda e hobennan pa haci un decision di voto cu un tiki mas contenido den e siguiente eleccion.

Te cu awor esaki ta bay bira e unico y hopi hende a cuminsa pidi si ta bay tin un di dos debate. Ta bay tin un moderador cu nan lo anuncia como sorpresa. E ta bay haci tur e preguntanan y percura pa tur hende keda na tempo y al caso. Ta bay tin dos parti: riba e prome ta bay tin tur e lidernan presente pa debati y por reacciona. Na di dos parti lo bin den grupo di dos of tres hende pa sigui debati. Tur lo tin un 'opening' y 'closing' statement.

Carchinan

Carchinan ta obtenibel na Colab Workspace na Anasstraat #4 di dialuna pa diabierna y nan ta solamente 10 florin. Despues di 30 di juni e prijs ta bira 15 florin. Sra. Bergen: "Por cumpra solamente un maximo di dos ticket pa persona pa nos por tin un control di esaki y ta rekeri un ID valido. Pa loke ta partido y organisacionnan grandi maximo ta dies ticket. Nos ta haci esaki pa tin un balans. Nos meta principal ta pa trece informacion y brinda tur partido e oportunidad pa bin cu nan vision, solucion y metanan."

